

一切智光明仙人慈心因緣不食肉經

大乘單本今附秦錄失譯

如是我聞一時佛住摩伽提國寂滅道場彌加女村自在天寺精舍時有迦波利婆羅門子名彌勒軀體金色三十二相八十種好故銀光明黃金校飾如白銀山威光無量來至

行四

佛所

爾時世尊與千二百五十比丘經行林中又有結髮梵志五百人等遙見彌勒威儀庠序相好清淨五體投地如銀山崩成金花聚衆寶間廁金華金臺七寶為果於臺閣中有妙音聲而說偈言

我見牟尼尊 面貌常清淨 百福相奇特  
世間無倫匹 煩惱垢永盡 智慧悉成滿  
一向常歸命 身心無疲倦 故我以五體  
欲得勝安樂 脫苦無所畏 敬禮釋迦文  
時諸梵志見聞此事白佛言世尊如此童子  
威儀庠序光明無量與佛無異於何佛所初

發道心受持誰經唯願天尊為我解說

佛告式乾梵志汝今諦聽善思念之吾當為汝分別解說令汝歡喜乃往過去無量無邊阿僧祇劫時有世界名勝華敷佛号彌勒恒以慈心四無量法教化一切彼佛說經名慈三昧光大悲海雲若有聞者即得超越百億

萬劫生死之罪必得成佛無有疑慮時彼國中有大婆羅門名一切智光明聰慧多智廣博衆經世間技藝六十四能無不綜練聞佛出世說慈三昧光大悲海雲經即以世間一切義論難詰彼佛盡其辭辯而不能屈即便信伏為佛弟子尋發阿耨多羅三藐三菩提

心而作是言我今於佛法中誦持大慈三昧光大悲海雲經以此功德願於未來遇著數劫必得成佛而号彌勒於是捨家即入深山長髮為相修行梵行八千歲中少欲無事乞食自活誦持是經一心除亂彼時世間有兩星現國王淫荒彗星橫流連雨不止洪水暴

長仙人端坐不得乞食經歷七日時彼林中有五百白兔有一兔王母子二獸見於仙人七日不食而作是言今此仙人爲佛道故不食多日命不云遠法幢將崩法海將竭我今當爲無上大法令得久住不惜身命即告諸免一切諸行皆悉無常衆生愛身空生空死

行四

八

未曾爲法我今欲爲一切衆生作大橋梁令法久住供養法師爾時兔王即爲羣兔而說偈言

若有畜生類 得聞諸佛名 永離三惡道  
不生八難處 若聞法奉行 生處常值佛  
信法無疑惑 歸依賢聖僧 隨順諸戒行

如是疾得佛 必至大涅槃 常受無上樂

爾時兔王說此偈已告諸兔言我今以身欲供養法汝等宜當各各隨喜所以者何我從多劫喪身無數三毒所使爲鳥獸形唐生唐死未曾爲法吾今欲爲無上法故棄捨身命供養法師時山樹神即積香薪以火然之兔

王母子圍遶仙人足滿七匝白言大師我今爲法供養尊者仙人告言汝是畜生雖有慈心何緣能辦免白仙人我自以身供養仁者爲法久住令諸衆生得饒益故作此語已即語其子汝可隨意求覓水草繫心思惟正念三寶爾時兔子聞母所說跪白母言如尊所說無上大法欲供養者我亦願樂作此語已自投火中母隨後入當於菩薩捨身之時天地大動乃至色界及以諸天皆雨天華持用供養肉熟之後時山樹神白仙人言兔王母子爲供養故投身火中今肉已熟汝可食之時彼仙人聞樹神語悲不能言以所誦經書

行四

置樹葉又說偈言  
寧當然身破眼目 不忍行殺食衆生  
諸佛所說慈悲經 彼經中說行慈者  
寧破骨髓出頭腦 不忍噉肉食衆生  
如佛所說食肉者 此人行慈不滿足  
當受多病短命身 迷沒生死不成佛

時彼仙人說此偈已因發誓願我世世不起殺想恒不敢肉入白光明慈三昧乃至成佛制斷肉戒作此語已自投火坑與免併命是時天地六種震動天神力故樹放光明金色晃耀照千國土時彼國中諸人民等見金色光從山樹出尋光來至既見仙人及以二兔死在火中見所說偈并得佛經持還上王

王聞此法傳告共宣令聞此者皆發無上正真道心

佛告式乾汝今當知爾時白免王者今現我身釋迦文尼佛是時兔兒者今羅睺羅是時誦經仙人者今此衆中婆羅門子彌勒菩薩

摩訶薩是我涅槃後五十六億萬歲當於儴佢轉輪聖王國界華林園中金剛座處龍華善提樹下得成佛道轉妙法論時五百羣兔者今摩訶迦葉等五百比丘是時二百五十山樹神者舍利弗目犍連等二百五十比丘是時千國王跋陀婆羅等千菩薩是彼王國

土諸人民等得聞經者從我出世乃至樞至於其中間受法弟子得道者是

佛告式乾菩薩求法勤苦歷劫不惜身命雖復從報受畜生身常能爲法不惜軀命投於火坑以身供養便得超越九百萬億劫生死之罪於是得在恒河沙等無量諸佛先亦先

彌勒前得成佛道汝等云何不勤爲法

佛說是語時式乾等五百梵志求佛出家佛言善來鬚髮自落即成沙門佛爲說法豁然意解成阿羅漢八萬諸天亦發阿耨多羅三藐三菩提心時會大衆聞佛所說各各稱讚菩薩所行舍利弗白佛言時彼仙人投火坑

行四

十

已爲生何處佛告舍利弗時彼仙人投火坑已生於梵世普爲一切說大梵法乃至成佛轉大楚輪所說經典亦名慈三昧光大悲海雲所制波羅提木叉不行慈者名犯禁人其食肉者犯於重禁後身生處常飲熟銅至彼仙人得作佛時如彌勒菩薩下生經說尊者

阿難聞佛所說即從座起偏袒右肩右膝著地合掌向佛又手長跪而白佛言世尊彌勒成佛所說戒法乃以慈心制不食肉爲犯重禁甚奇甚特時會大衆異口同音皆共稱讚彼國衆生不食肉戒願生彼國世尊悉記當得往生尊者阿難復白佛言當何名此經云

何受持之佛告阿難此法之要名白兔王菩薩不惜身命爲無上道亦名一切智光明仙人慈心因緣不食肉經如是受持尊者阿難及諸比丘聞佛所說歡喜奉行

十末

一切智光明仙人慈心因緣不食肉經